

Аллоҳ барчамизга мустаҳкам соғлик берсин!



05:00 / 17.03.2021 2615

Сиҳат-саломатлик соғлом кишиларнинг бошидаги бир тож бўлиб, уни дардмандларгина кўра оладилар.

Офият (кишида) бардавом бўлар экан, ундан жоҳил қолинур. Йўқотилар экан, (у соғликнинг) қадри англаб қолинур. Барчамиз Аллоҳдан дуо қилиб, офият сўрайлик, ва офият соғлик учун шукр қилайлик.

«Агар менга сўраш ҳуқуқи берилса эди, фақат афву офиятни сўраган бўлар эдим», дейди олимлардан бири.

Агар Аллоҳ таоло ҳалок қилишни истаганда, аниқки, инсонларни юз фоиз ўлдирувчи, қириб юборувчи вирусни юборган бўлар эди. У Зотни бундай қилишдан ҳеч нарса ожиз қилолмайди.

Лекин У огоҳлантиришни истади. (Бу билан) бандага нақадар ожизлиги, заифлиги ва қўрқувини кўрсатиш учун вирусдан вафот топаётганлар нисбатини юздан уч фоизга туширди.

Мўмин мусулмон банда Аллоҳнинг Қодир ва Молик эканига, ҳар нарса Унинг чангалида ва қаҳри остидалигига кучли эътиқод ва ишонч билан

туриши лозим. Шуни ҳам ёдда тутиш керакки, Роббимизга юзлантирадиган бало Роббимизни унуттирадиган кенглик ва неъматдан кўра яхшироқдир.

Қанча йигит неъмат ичра бедор бўлиб, кейинги кеча ундан олиб қўйилгандир.

Имом Насайй Абу Бакр розияллоху анхудан ривоят қилган ҳадисда Пайғамбар соллаллоху алайҳи васаллам: «Аллоҳдан афвни, офиятни ва мустаҳкам соғлиқни сўранглар. Ҳеч бир кимсага яқийндан кейин мустаҳкам соғлиқчалик яхши нарса берилмагандир», деганлар.

Ислом соғлиқни Аллоҳ таоло томонидан бандага берилган улуғ неъмат эканини, унинг учун банда шукр қилиши лозимлигини таъкидлаш билангина кифояланиб қолмайди. Ислом соғлиқни сақлашнинг йўллари ҳам ўргатади. Келинг, ўша нарсалардан баъзиларини жуда ҳам қисқа равишда ўрганиб чиқайлик.

— Тозаликка риоя қилиш.

Дунё тарихида ҳеч ким, ҳеч қандай тузум ва дин тозаликка риоя қилишга Ислом диничалик аҳамият бермагани маълум ва машҳурдир.

— Соғлиққа зарар етказувчи ва атрофни ифлос қилувчи нарсалардан қайтариш.

Ислом маданиятида мусулмонларнинг покиза бўлиши билан бирга юксак дидли бўлиш ва атроф-муҳитни ифлос қилмаслик ҳамда кишилар саломатлигига зарар етказувчи тасарруфлар қилмаслик уқтирилади. Чунки бундай ишлар турли хасталиклар тарқалишига сабаб бўлиши мумкин.

— Бадантарбия.

Ҳозирги кунда соғлиқни сақлаш, хасталикка чалинмаслик учун бадантарбия қанчалик аҳамиятли эканини ҳамма тушуниб етган. Каттаю кичик иложи борича бадантарбияга эътибор беришга ҳаракат қилади. Бу нарсага айниқса, ривожланган давлатларда одамлар жуда ҳам берилганлар. Ҳаммининг кучли, қувватли, эпчил, соғ-саломат бўлгиси ва хасталикларга чалинмаслиги келади. Бунинг учун эса бадантарбия ила шуғулланиш керак.

Исломда бу ишга алоҳида эътибор берилгани ва бу ҳақда Пайғамбар соллаллоху алайҳи васалламнинг баъзи ҳадиси шарифлари бор.

— Соғлиққа зарарли нарсаларнинг ҳаром қилиниши.

Исломда соғлиқни сақлаш йўлида кўрилган чораларнинг энг муҳими инсон соғлиғи учун зарарли бўлган нарсаларнинг ҳаром қилинишидир. Ҳозирги кунга келиб соғлиқни сақлаш бўйича анча муваффақиятларга эришилган бўлса ҳам, ушбу соҳада, яъни инсон соғлиғи учун зарарли бўлган нарсаларни ҳаром қилинишида Ислом динчалик бошқа бирор дин айтарли ҳеч нарса қила олгани йўқ. Исломда эса бу масала минг беш юз йил илгари ҳал этилган.

— Исроф ва қизғанчиқликни ҳаром қилиниши.

Исломда инсон соғлиғини сақлаш мақсадида, ўзига керакли нарсаларни ҳам меъёридан оз еб ўзини-ўзи хасталикка мубтало қилмаслик учун қизғанчиқ бўлиш ҳаром қилинган.

Шу билан бирга Исломда соғлиққа зарарлигини эътиборидан ортиқча кўп тановул қилиш ҳам ҳаром қилинган.

— Соғлиқни сақлаш мақсадида енгиллик ва рухсатлар берилган.

Исломда айнан соғлиқни сақлаш мақсадида баъзи Аллоҳ таоло фарз қилган ибодатларни енгиллаштириш, кейинга суриш ёки бутунлай кечириб юбориш йўлга қўйилган.

Мусулмонларнинг тиббиёт бўйича эришган ютуқларини тўлиқ ўрганган, бу соҳага тегишли бошқа нарсаларни ҳам ўрганган мутахассислар жуда ҳам кўп. Фарблик, овруполик тарихчилар, шарқшунослар, тибшунослардан ҳам бу соҳага ўзини бағишлаганлар анчагина бор.

Ал-Азҳар шайхи Аҳмад Тоййиб айтадилар: «Қаҳвахона ва чойхоналарга (тезроқ) қайтишни орзу қилаётганлари масжидларга қайтишни орзулаётганларидан кўпроқ бўлган бу умматдан Аллоҳ қандай қилиб ҳам балони кетказсин?!».

Барчаларимизга Аллоҳ таоло офият берсин. Ёмон касалликлардан Ўзи ҳимоясига олсин!

Манба:

«Олам ва одам, дин ва илм» китоби

@arabicuz

Хуршид Маъруф тайёрлади